

8
3
MARVARD COLLEGE LIBRARY
FROM THE
MARVARD-YENCHING
INSTITUTE

APR 29 1930

65

~~Ch L 3203,88~~

Ch L 3203 /3142/83

江南通志卷一百五十五

人物志

忠節三 安徽寧池太五府

安慶府

三國陳武字子烈松滋人年十八謁孫策於壽春因從渡江征討有功拜別部司馬策破劉勲多得廬江人以武為督所向無前孫權時累功進偏將軍建安二十年從擊合肥奮命戰死權哀之自臨其葬

宋劉源字叔清淮西野人原義兵長也今為潛山地源性慷慨負大節咸淳中率山寨兵以保障鄉里德祐元年范文虎以安慶降元景炎二年源與安撫使張德興起



兵倡義復司空山傅高舉兵應之源建寨野人原相爲
犄角遂復黃州壽昌軍用景炎正朔元兵攻源寨不能
克遂移兵襲破司空山寨破之源守禦三年至是德興
及傅高俱死黃州壽昌復陷元兵復困之力戰而死

元葛昂字銘德潛山人元季兵起昂募義保障鄉曲駐兵
皖山累立戰功事聞授安慶萬戶府金符千戶後天完
兵攻安慶府城陷昂死之

陳道夫懷寧人余闕守安慶得便宜辟道夫爲懷寧尹
撫綏有方時敵攻城勢急闕欲自殺道夫曰忠臣當死
於敵徒死何名今力尙未窮宜與公死守幸一戰而勝
可保全江淮矣遂屢却強敵城陷與闕同死之

明王勝桐城人喜讀書尤好兵法元末歸明累功官右副
元帥攻陳友諒取江州賜金帶良馬鄱陽之戰謀欲火
攻勝應募詐降夜縱火焚其營乘火奮擊大破之勝死
於火贈太原郡侯祀康郎山

甘霖懷寧人洪武丁卯鄉薦建文時爲御史剛介敢言
靖難兵起被執不從遂求死從容受戮

方法字伯通桐城人洪武己卯鄉薦授四川都司斷事
永樂改元諸藩表賀法不署名尋詔逮諸藩不署名者
法登舟謂家人曰至安慶告我次望江瞻望再拜曰得
望吾先人鄉足矣自沉於江

俞鑑字元吉桐城人以進士授職方主事英宗北征備

官隨駕郎中胡寧當行以病求代鑑慷慨許諾或曰家遠子幼奈何鑑曰爲國臣子敢計身家尙書鄺埜知其賢數與計事鑑曰惟力勸班師耳竟死土木之難

周璽字天章太湖人弘治丙辰進士累官給諫劉瑾專權璽疏其擅改成命乞正典刑瑾銜之囑遷順天府丞使去言路時錦衣指揮楊玉附瑾誣璽蔑視使臣矯制下獄令玉自鞫玉杖之三十璽不少屈曰吾死不足惜令忠義畏懼可惜耳瑾聞益怒加杖之遂死於獄後瑾伏誅正德朝賜祭世宗卽位復賜祭廕其子

汪鑾懷寧人正德己卯宸濠擁衆攻城北鑾遇被執脅令諭城中出降誘以崇爵鑾至城下大呼曰王師已破

南昌賊困極將遁可堅守賊怒解其屍賊退衆犬爭欲噉之一犬守護甚力遂不能進見者知係鑾犬因知爲鑾屍也有司狀聞詔旌其門

張澤字大被懷寧人以選貢授沅江令擢衢州別駕出逋賦者於囹圄民感泣爭輸時督府胡宗憲威傾兩浙其前驅求索無厭守令奉之惟謹澤縛而杖之尋移廣安牧出寃濫五十餘人特遷雲南僉事分巡安普時武定徭部鳳繼祖拒命奉檄督戰賊伏起被執歸寨澤衣冠危坐賊願得手書移軍門澤叱曰天朝大臣爲賊作說客耶遂死之事聞贈光祿少卿賜廟額忠節

左光斗字遺直桐城人萬曆丁未進士由中書授御史

議興水利北人始知藝稻光宗昇遐與楊漣爭移宮兩
人力爲多朝野並稱爲楊左累遷僉都御史漣疏魏闢
光斗與謀又草忠賢二十二斬罪疏未上而謀洩奪職
歸羣小憾不已搆汪文言獄入光斗名逮至京師同漣
拷訊死忠賢敗贈太子少保諡忠毅

張秉文字含之桐城人淳之孫萬曆庚戌進士由知縣
歷任江楚閩粵司道在粵勦海寇李魁奇等崇正時仕
至山東左布政使濟南圍急瀝血遺書二子有身爲大
臣當死封疆語拒守中箭死妻方氏妾陳氏投水死贈
太常卿

阮之鈿字實甫懷寧人以薦舉授穀城知縣未至賊獻
忠已據其城求撫總理熊文燦許之令屯牧之鈿察其
意欲積穀待時而發密報文燦勸設備不聽獻賊果反
之鈿刺血題壁曰讀盡古聖書籍養成浩然心性今日
殺身成仁不愧賢良方正遂仰藥未絕賊索印不予遇
害贈尚寶少卿

孟振邦字維新安慶衛世職乞休歸養中丞史可法強
出視衛篆擢叅將左兵陷城遂殉之月餘始得屍顏色
如生

夏統春字元夫桐城人以保舉授黃陂縣丞流賊犯陂
邑統春已遷麻陽知縣未行乃督衆拒守親冒烽火衣
不結帶凡十五晝夜賊僞解圍去越五日乘昧爽潰城

統春巷戰力竭被執歎曰惟一死報朝廷耳罵賊不屈賊支解之

吳普昭字克明桐城諸生崇正丁丑流賊逼掠率鄉民團聚格鬪十餘日被害妻孫氏痛夫難哭泣三月死子先璘先曜殉之婦李氏許氏義不受辱亦死人謂一門五義云

笄光弘字宏生桐城人端方有介節崇正丁丑遇流賊不屈死之

左光燦桐城諸生崇正丁丑突遇賊被縛搜袖中得一簿知爲保障一方計憾而叱之光燦罵曰殺卽殺鼠輩更何問哉賊益怒拔舌斷足備極慘毒知縣張利民請

於御史題旌焉時同邑姚孫極王夷吾趙之葵姚孫林陳力均死之又有左旗以庠生殉節

汪之璞字石生潛山人明末流寇爲亂衆聚保崑崙推璞爲長張獻忠環攻璞屢出奇謀多所斬獲寨賴以全嘗上八策於撫軍黃配元元奇其才留麾下曰吾得之璞流寇不足平也會省親歸寨遇寇攫獲牌票脅之降大罵不屈賊支解之配元聞之大慟給扁致祭同邑王培基字仲因爲太湖縣城守城陷被執死之又王五邦徐顯問俱守義死

戴君德太湖人通五經精曆律著有古史斷等書行世崇正壬午流賊陷城憤誓不屈殺之妻沈氏同殉雷氏

攜兩女孫俱赴水死同邑王鼐臣吳夢暘雷綿祚雷延發雷膺祚阮之甫黃應龍俱守義死

何大同字于野宿松廩生崇正壬午流寇猝至被執擁至寨下曰貫爾死為我呼開寨門大同不應復擁之去復至一寨令曰前堡汝家所在故不從今可速賺之大同曰皆戚里也肯以數百人命易我一命乎遂遇害張鳳翥宿松人崇正辛未進士累官兵備副使分守承德護顯陵單騎招安土寇值闖賊東下親自登陴嚴守勵眾而郡屬開門迎賊鳳翥身受三刃扶創走郢鄂募勇敢恢復竟卒於路

周日耀桐城人外兄左光斗被逮道路以日日耀獨左

右檻車送之京泊左死於獄仍扶其櫬歸甲申五月聞闖賊破京師仰天大慟絕粒九日嘔血數升而卒

胡士恂懷寧人性至孝力學尤邃於易明末左兵陷城慷慨罵賊以死妻張氏亦赴水死二子再寅紹虞俱悲憤不食死紹虞妻蔣氏亦自縊殉時同邑何霖方應旂陳尚炳俱罵賊死

邱全潛山人土寇攻崑崙崙崙全使招崙崙中出降全佯許之至崙門大呼固守勿降賊刳其腹而去

王九鼎字在德潛山人明季北直故城令時流寇連陷七十餘邑故城原壘土而卑隘九鼎以忠義獎率士民死守浹旬力不支城陷遂以身殉先是九鼎以單騎赴

任左右惟二子基泰泰踉蹌赴難叩闈上書奉旨查覆
俱稱歷任屢著惠績一死凜烈千秋贈太僕寺少卿廕
一子

江襟楚字雲渚由知縣轉瓊州別駕解組歸遇流賊被
執不屈大罵截舌而死同邑劉守中亦殉節

陳學良字象頤望江人以明經司鐸祁門及嶺東韶郡
教歸里與弟學開隱居講道乙亥流寇遍鄉落學良與
弟守歲達旦偏近賊營或勸其匿笑曰命果骫雖履能
免耶昆弟猶行交拜禮次日賊入門露刃挾之學良厲
罵遂遇害時年七十八

陳貞申潛山人郡庠生少負志節有文行崇正丁丑爲
流寇所執脅之跪不屈賊曰爾爲秀才可爲我供書寫
貸爾死貞申厲聲曰我豈爲賊役者憤罵不已賊怒支
解之同邑徐益隆吳自周王世美俱不屈死

柴維煥字有文宿松諸生同三子避賊於陳漢山並爲
賊執維煥身長大饒膂力欲強與俱不屈賊殺其長子
以脅之旋殺其次又殺其季終不屈賊乃殺之時同邑
陳昌言夏時行石思琳俱死義

孫臨字武功桐城人兵部侍郎晉之弟楊文驄招致幕
中奏爲職方主事文驄殉節臨與同難

張應奎懷寧人年七十猶讀書不輟所著有大衍圖邵
子園中圖解西銘說諸書城陷不屈死

國朝汪吉字迪庵太湖縣人順治初以功授荊州遊擊值小
李等賊突犯當陽縣屬時賊多兵寡吉奮勇無前挺身
血戰而死奉

旨優卹贈廕賜祭葬

韓應震字伯卿太湖人順治己丑除廣東信宜令三年
擢兵馬指揮未出廣遇賊犯信宜守將田自強反顏從
賊縛應震送賊營應震大罵不屈而死
趙煥文懷寧人以郡掾任陝西白水縣典史康熙戊午
興安賊叛令煥文招撫賊執而脅之煥文厲罵乃拔舌
刳日棄屍井中事聞

賜祭贈河南封邱縣主簿廕一子

徽州府

南北朝陳程文季字少卿靈洗子多幹略有父風太建中
從吳明徹北伐齊常為先鋒齊軍咸憚之號為程虎後
隨明徹侵周戰敗不屈死於長安贈散騎常侍諡曰威

悼

宋凌唐佐字公弼休寧人元符進士建炎間知南京劉豫
陷南京被執唐佐密疏其虛實以蠟書告於朝事泄遂
見害詔贈徽猷閣待制

曹文休寧人崇寧進士授睦州建德丞方臘之亂死其
官詔進秩與恩澤

程全字禹昌休寧人方臘盜起縣令棄印去全起義兵

以軍功授承節郎苗劉之亂從劉光世勤王賊平授開州團練使後死王事贈官錄其後

曹夬黠人崇寧登第任本州通判方臘之亂死於官
盧臣忠黠人政和進士歷官右正言後扈駕建康敵使有逼近御舟者臣叱退之失足墜水中數日帝使沒者拯之拱立如生贈右諫議大夫

詹世勛婺源人紹興三十年以薦爲舒城縣民兵正將嘗以六十人敗金兵於栲栳原明日復悉衆來世勛戰死

朱弁字少章婺源人建炎初爲通問副使與王倫使金通問兩宮留五載倫將歸弁曰使者以節爲信今印亦信也願留印使弁得抱以死遂懷印起臥與俱金人迫弁仁劉豫弁曰吾恨不食其肉肯臣之乎吾有死耳後和議成弁南歸入見便殿言敬情秦檜惡之僅轉奉議郎

王觀國字賓老祁門人紹興十八年進士授陝州宜興縣尉值賊起不屈被害贈官一等錄其家

程光廷字朝望休寧人嘉定進士知羅山縣趙方辟爲節制三關部軍策應歿於王事贈朝奉郎

許月卿字大空婺源人淳祐間登第時徐元杰力攻史嵩之史陰殺之月卿率三學諸生伏闕訟寃後又數上書斥丁賈奸邪出佐江西漕宋亡衰服深居三年不言

謝疊山嘗書其門曰要看今日謝枋得便是當年許月卿

汪立信字誠甫婺源人淳祐進士歷知江陵府勸賈似道盡國中兵沿江分屯置府聯絡固守否則輸歲幣得緩師期以修守備俱不用咸淳十年似道督師次江上以立信為招討使募兵援江上諸郡受命即日上道與似道遇蕪湖曰某去尋一片趙家地上死爾至高郵欲控引淮漢為後圖尋聞似道師潰乃置酒召賓佐與訣慟哭三日扼吭而卒贈少傅子麟在建康不肯從眾降走閩死

程洙休寧人淳祐進士授貴池縣主簿繼調上元盡誠撫字當代民請留不得發元兵入建康百官降附洙獨沐浴闔門縊死有南窗詩集

胡廷桂字伯詵婺源人咸淳進士授平樂尉饒守唐震素知其才辟居簽幕德祐元年元兵臨城與震協謀捍禦城陷皆死之

夏師堯字達德休寧人咸淳進士授諫議郎嘗忤權奸被謫後陞翰林學士承旨扈從航海元兵襲崖州死之友江友直字德正歙人為本州教授伯顏入臨安友直升堂痛哭不食死葬梅口人名其墓曰餓殺塚

程楚翁婺源人元兵入臨安楚翁潛謀興復事洩被執復脫去投馬廷鸞謝枋得在閩遂入閩從之及枋得被

執北去楚翁遂死逆旅中

汪維崇字賢甫歙人妻福王與芮女授承節郎及革命不食死

元汪澤民字叔志婺源人延祐五年進士歷同知推官多異政以知州召修宋遼金三史除國子司業以禮部尚書致仕居宣州長鎗軍叛來寇城城陷被執不屈死贈官諡文節所著有巢深燕山宛陵三稿

鄭玉字子美歙人至正十四年除翰林院待制浮海徵之辭疾不起明兵至守將將要致之玉曰吾豈事二姓者具衣冠北面再拜自縊死

吳訥字克敏休寧人少能詩學兵法善騎射至正未授建德路判官兼義兵萬戶守徽州明兵至戰收不屈自刎死年二十七

明程國勝休寧人元末結鄉兵保鄉里明兵下徽州拔爲總管府先鋒從征有功太祖與陳友諒戰康郎山其將張定邊直犯太祖舟舟適膠淺國勝與諸將駕飛舸奮擊水怒湧舟始脫而國勝等深入敵艦力戰死之追封定安郡侯諡忠愍

汪清字猷安休寧人太祖與陳友諒戰鄱陽湖靖詐降友諒爲內應夜舉火中外夾攻火中猶作戰鬪狀遂焚死錄忠贈盱眙子祀於康郎山

黃彥清歙人建文時爲國子博士以名節自勵永樂初

坐私諡建文帝被逮不屈死

程通字彥亨績溪人祖平坐法遣戍延安父以誠省兄於廣冒瘴死通昇父柩歸葬廬墓三年赴太學上書陳情乞祖還鄉辭極懇切太祖憐之命兵部除其籍驛送平還庚午通舉鄉試授遼府長史文皇將舉兵通上封事陳備燕之策及卽位械至京師死獄中

汪一中字正叔歙人嘉靖甲辰進士歷任刑部主事改都水郎治蘆溝決堤有功擢江西副使大盜猝起薄泰和巡檢劉芳力戰死一中祭之曰爾猶死疆事我不滅賊何以生爲遂列陣俘斬數賊明日賊大集一中躍馬當賊鋒脅中鎗臂中刃遂與將王應鵬俱戰死贈光祿

寺卿諡忠愍

程箕字斗南績溪人明經任福安教諭嘉靖間倭突至箕與令共守禦外援不至城陷或勸避去箕叱曰分城以守可避死乎督戰益力被執不屈死弟子員從死者二十二人郡上其狀褒予恤典

凌子儉字仲廣歙人萬曆戊子舉人歷戶部郎陞曲靖知府道經貴州值安寇之變督撫留爲監軍共城守圍久糧絕至煮革以食儉書壁曰一瞑萬世不泯九死百折不回遂歿

吳懷賢字齊仲休寧人以與纂修授中書舍人讀楊漣劾魏忠賢疏稱快註其旁曰當如任守忠卽時安置吳

昌期以劾忠賢還籍懷賢遺書稱之辭多激烈同官傅應星忠賢甥也懷賢不加禮應星乃以告忠賢怒坐楊左黨下獄拷之從容言曰懷賢何人乃得與楊左同死遂斃於獄懷宗初贈工部主事

方國儒字道醇歙人少孤事母至孝登天啟辛酉鄉舉授保康令獻賊躡境國儒力戰七晝夜賊遁去踰月賊擁十餘萬衆復自房山來攻外援盡絕被執罵不絕口身中七刀死

吳賜玉歙人以蔭判南康勦賊遇害贈按察司僉事

汪偉字叔度休寧人明季戊辰進士授慈溪令擢翰林檢討充東宮講官流賊陷承天荆襄偉議九江增設總督從之賊薄都城守兵乏餉偉出貲市餅餌充食及城陷妻耿氏先投繯乃書壁自經死

世祖章皇帝賜諡文毅

吳開先歙人遊澤州崇正五年流賊躡山西監司知開先勇略署爲將使擊賊賊敗去從沁水轉掠陽城開先渡沁戰擊斬數百人砲盡無援戰死

吳可箕歙人爲南京國子監生聞賊陷京師自題詩衣襟上縊死於鷄鳴山之關侯祠

凌駟歙人明季癸未進士以職方從督輔李建泰出拒闖賊至保定駟獨與賊戰被創旣死復甦乃走臨清建義於齊豫間勢不可支從容自盡

康正諫字秦木祁門人明季舉人授和州學正流寇圍城急與妻汪氏先後投池死寡媳章氏亦赴井死贈國子監監丞

馬嘉字六禮祁門人明季舉人甲申聞闖寇之難自縊死

國朝鄭之文字貞卿休寧人臨清籍順治己丑武進士授紹台道守備十四年海寇犯順之文獨障危城相持閱月食援俱絕賊斬門劫之百計誘降之文罵不絕口遂遇害

寧國府

晉俞縱宣城人咸和初為桓彝部將蘇峻之亂彝遣縱守蘭石與峻將韓晃遇眾寡不敵左右勸其退守縱曰吾受桓侯恩厚吾之不負桓侯猶桓侯之不負國也力戰死贈興古太守

宋鮑瑑旌德人宣和中方臘寇旌德瑑糾義兵擊破之後賊張遇逼黃池瑑以禦寇功補承信郎又明年賊盧進寇涇瑑率兵力戰中流矢卒

王行之字才仲太平人為婺州士曹宣和三年方臘黨寇婺州守臣皆遁去行之曰吾獄官分當死職遂遇害贈通直郎

詹友端宣城人政和鄉貢建炎初上書言復仇取中原事語甚壯後戚方圍宣城友端倡眾守禦賊平補廸功

郎紹興壬子盜發西安郡委友端攝尉與賊力戰中流
矢卒

王相如字次卿宣城人建炎初江右盜起相如爲所得
州有檄招附賊令草檄以報相如叱曰吾卽死不能爲
賊作牒遂遇害

方致堯寧國人建炎庚戌叛將戚方寇寧國致堯率鄉
兵破之伏石嶺賊益兵至遂被執賊脅之降罵曰我豈
從賊反耶賊殺之

趙汝彛宣城人嘉熙間判文州北兵來攻與知州劉銳
晝夜搏戰城守踰兩月援絕城陷汝彛被執不屈賊鬻
殺之

周真字子繼旌德人咸淳中奉文天祥檄援本縣尉同
邑宰守縣元兵壓境力戰死之

楊義忠字大書寧國縣吏元伯顏攻寧國知縣趙與禔
戰死義忠率衆城守凡六十晝夜亦死之

〔元〕王翕宣城管軍百戶至正間長槍賊攻郡城將陷翕呼
弟曰我受國恩當死顧老母在汝宜出避語訖卽殺妻
子自刎死

張文貴宣城百戶至正十七年明兵下寧國路守將出
降文貴仗節死妻妾亦自殺

梅實字仲實宣城人官集慶路照磨至正末明兵圍集
慶城陷不屈闔門遇害

張國岡南陵人至正丙申趙雙刀寇南陵國岡率義兵與戰兵敗被執不屈賊斷其兩膝至死罵不絕口

明何通泰字季貞寧國人元末嘗倡鄉兵却紅巾賊後寧國既屬明而僞吳兵復攻其壘城陷自剄里人爲立祠汪文炳字炳叔洪武初爲都昌知縣陳友諒擁衆來攻援絕被執賊欲官之抗詈而死

陳迪字景道宣城人洪武鄉薦召爲翰林編修預修大典擢雲南布政烏蒙曲靖等煽亂擊破之建文初徵爲禮部尙書靖難兵起疏陳大計與齊泰極論李景隆不可任督餉過家未嘗一入聞變赴京成祖召迪責問抗詞不屈與子鳳山丹山等同日磔死衣帶中得詩有千

秋公論明於日照徹區區不二心語懷宗末賜諡忠烈俞逢辰字彥章宣城人有學行洪武鄉薦選充燕府伴讀建文初成祖稱病密謀靖難逢辰力諫且密告藩間張昇謝貴曰王本無恙公等勿懈隄防及師起復泣諫誅死懷宗末賜諡忠愍

萬琛字廷獻宣城人成化舉人弘治中令瑞金適閩廣流賊大入有勸琛遁者琛斥之率民兵與戰力屈被執罵賊遇害賊退得其屍身被創十六截指三詔贈光祿寺卿予廕

吳景字伯陽南陵人弘治進士歷官四川按察僉事守江津時播州賊逼川南御史遁去景禦賊手殺數人城

陷大呼曰寧殺我毋殺百姓被執不屈死之

饒鼐字象台旌德人天啟舉人除蒲臺令城陷死之御

史旌曰烈尹

朱懋華字仲弢南陵人進士授浙江定海知縣莅政數
月聞闖賊入京明社爲墟乃北望遙拜自縊於署

沈壽崇字旭海宣城人有容子以武進士歷官興都留
守闖賊入承天罵賊而死贈都督僉事

屠紹臯字士際寧國人義英孫也以恩貢授上津知縣
獻賊陷城被執不屈死

國朝李煌字仲宣宣州衛人也順治間恩貢授萊州推官尋
攝膠州鎮將海時行擁兵叛脅之不從遂見害贈僉事

汪化鰲字魚君涇縣人由拔貢歷漢中府同知吳逆

漢中偏受僞職鰲撫膺痛哭目經死橐葬漢中城南

孫斌字淑獻南陵人以武進士爲福寧遊擊耿逆反招

斌斬其使飛報督撫請兵合討耿逆怒縛至省斌抗

詞不屈發置興化棄妻子而逃至背嶺山追卒至挺杖

交下推墮峻崖腰肋皆折丁巳春王師下興化斌扶

杖謁軍門奉

旨優叙累官夔關副將都督同知聞繼母沒求解任

詔特許之武臣丁憂之例自斌始

劉讓宣城人從征粵西以軍功授西林知縣康熙二十
年隨征貴州軍前散餉於南寧遇賊逼脅不從被殺

池州府

唐姚顯字當晦銅陵人廣明元年黃巢陷潼關顯拒戰死僖宗嘉其忠追爵王諡英烈立廟祀之

宋羅復字無悔銅陵人登政和二年進士第知牂城縣靖康之難兵逼城下復率縣人力禦之身被重創不去南渡後以忠節褒

程端中自河南遷池州建炎中知六安軍事北兵攻六安端中固守城破死之池州都統制程全收其骨葬於池

葉諒建德人開禧三年北兵分道南下諒集義兵拒之中流矢卒贈武經大夫立祠所居雙溪

丁黼字文伯石埭人登淳熙十四年進士第知信州有修城功轉運使真德秀薦之端平三年以四川制置副使兼知成都府成都逼近敵壘城中兵不滿七百累疏告急不報元兵圍城出戰不利或勸其走威茂避之黼曰職在守土走將安之悉衆出東門力戰中鏑死贈顯謨閣待制諡恭愍仍敕建褒忠祠於其鄉

江應洪字泰之青陽人登慶元五年進士第有器識善邑宰趙方方後帥襄陽辟應洪爲佐方卒攝帥事後知德安府決數十年疑獄以理劇稱擢淮東提刑兼知揚州元兵大至多方禦之力屈死

華岳字子西貴池人爲武學生輕財好俠開禧中韓侂

胄當國岳上書極斥其罪編管建寧園土中侂胄誅放
還復入武學登嘉定武科第一為殿前司官以宰相史
彌遠當國鬱不得志謀去之事覺下臨安獄獄具坐議
大臣當死寧宗知岳名欲生之彌遠曰是欲殺臣者遂
杖死東市

清溪二生貴池人不知其姓名德祐元年元兵破池州
州倅趙昴發死之有二生撫昴發尸哭曰生為趙氏臣
死為趙氏鬼何以洗此冤清溪一泓水躍入弄水亭下
死

蘇劉義貴池人歷官殿帥初隸呂文德麾下及諸呂降
元招之不從死崖山之難

元陶起祖銅陵人至正間聚義兵捍鄉里衆恃以安授廬
江知縣判銅陵縣事遷池州同知為趙普勝叛軍所執
不屈被殺

明錢清字公清青陽人儻好義元末兵起清糾集義旅
捍衛鄉邑與趙普勝立寨相望寇來則拒退則率人力
耕給食一方倚賴及將軍常遇春兵至清率衆歸命授
千戶吳元年從征張士誠力戰死

柯永淳貴池人父德禮元末同錢清起義兵保障池州
明初從常遇春征伐有功官千戶永淳襲職永樂中從
英國公張輔征交趾力戰死

黃觀字瀾伯貴池人洪武辛未會試廷試皆第一授翰

林修撰日侍御前命編寫省貪錄撰法司榜文歷禮部
侍郎建文元年改官制爲侍中及靖難師渡淮觀奉詔
徵上游諸郡兵入衛還抵安慶聞金川門之變朝服再
拜自沉於羅刹磯急湍中妻翁氏暨二女家屬十餘人
盡死

湯九州石埭人少任俠游京師尙書鄭三俊見而器之
薦授京營小職歷遊擊懷宗六年爲昌平副總兵赴河
南追斬賊首混天王於馬鞍山繼復有陽邑青店夏村
橫山諸捷威名大著賊深畏之尋赴援山西中蜚語削
職俾殺賊自効九年以孤軍由嵩縣深入賊壘窮追四
十餘里沒於陣

李可受字季度青陽人自幼勵志節崇正六年以太學
生授澄城主簿時流寇躡秦中澄城屢被攻圍可受輒
佐其令以死守八年秋賊大至或勸可受棄城走可受
曰死吾分也走將奚之城陷不屈死

蘇瓊字青城石埭人崇正甲戌進士授景州知州景當
畿南劇衝多大璫要職瓊每與之抗爲所忌調知瀘州
時張獻忠屢犯瀘瓊堅守却之己卯冬有監司夜過邑
啟城賊乘之以入瓊督衆巷戰力竭被執脅降不屈罵
賊而死妻舒氏亦自殺婢僕從死者七人事聞贈太僕

卿

余瑀字聿高銅陵人崇正辛巳以貢授隨州判署州事

會流寇擾楚隨為賊往來屢經之路前牧多託故避去
瑯署事才八日而賊突至破州城索印不與且大罵遂
遇害

鄭三謨字都甫建德人尚書三俊兄由舉人歷南戶部
郎盡釐度支宿弊出為高州知府連署雷瓊廉三郡巡
守道以才能稱盜劫茂名獄掠及府庫三謨赴救為賊
所害郡人三日哭爭相度材運甓立廟祀之

湯文瓊字兆鰲九州從孫性至孝父母歿廬墓盡毀授
徒京師崇正甲申三月闖寇陷城文瓊慨然語其友曰
吾雖布衣獨非本朝臣子乎乃書報國二字於壁又書
衣衿云位無文丞相之位心存文丞相之心投繯而絕

越五日面色如生

陳公誥字大誥貴池人工文善書甲申五月聞北都淪
陷闔戶痛哭自經死

馬應魁字守卿貴池人為小將史可法拔為副總兵每
戰披白甲大書盡忠報國四字於背後巷戰死

國朝曹誠青陽縣人以貢歷寧州知州勤於其職康熙三年
土司昌言等作亂寇寧州誠盡力守禦城陷被殺

太平府

晉王諒字幼成丹陽人少有幹略參王敦府事稍遷武昌
太守時新昌太守梁碩專威交土敦以諒為交州刺史
既到境謀誅碩不克碩率眾圍諒廣州刺史陶侃遣救

未至而諒敗碩逼奪諒節諒固執不與遂斷諒右臂諒正色曰死且不畏斷臂何有憤怒而卒

樂道融丹陽人少有大志好學不倦務周人急有國士風爲王敦參軍敦以討劉隗爲名遣道融召甘卓同舉兵道融忿敦逆節說卓襲敦卓始然之率所部致討旣而復納敦和將旋軍道融晝夜泣諫憂憤而死

南北朝齊董僧慧姑孰人慷慨有節義晉安王子懋鎮尋陽僧慧爲防閤子懋起兵赴難僧慧預其謀及子懋遇害僧慧被執請於主帥願俟晉安斂畢就死王元胤義而許之白明帝減死配東冶子懋子昭基九歲以方二寸絹爲書訊其消息僧慧見書曰此郎君書也悲慟而

卒

宋石天麟字文祥禹勤子元豐中以勇敢應募偕侍禁李資由峽州入招撫溪峒諸蠻諭以禍福多迎降者資武人以殺降激變蠻復反天麟力戰遇害

唐敏求字好古當塗人宣和六年進士調德化主簿盜起敏求率衆捍禦力不支遂遇害事聞贈官補其子楠將仕郎

惠直字子溫當塗人崇寧二年進士歷太常博士建炎二年周公望使金奏辟同行及命下或勸直辭直曰天步方艱豈臣子擇利時乎兼程而進疾作卒高郵僧舍子貺官敷文閣直學士

孫德昭當塗人建炎中以諸王郡馬領兵禦北兵於大儀力戰而死贈忠烈侯

張伯麟字慶符當塗人以氣豪里中每慕古人奇節紹興初以明春秋補入太學時秦檜主和議百僚相戒以言伯麟痛憤因題齋壁曰夫差而忘勾踐之殺而父乎事聞檜下之獄筆楚無完膚坐以指斥罪流吉陽軍馬進當塗軍籍隸慈湖寨伉健沉鷲軍中憚之紹興中軍校周青等據城叛謀屠城後毆所掠絕江渡淮而北進陰結其儔十人挺刃雜隊伍中進突出斫青中頰餘無繼進者遂爲賊害併及妻子尋官軍收復州城上其事贈官立廟賜額明恩

陶居仁蕪湖人以行義聞鄉里爲鎮江錄事參軍元兵攻鎮江守臣遁統制官舉城降居仁被執逼使降居仁曰吾固知曆數已窮詎可失忠義求苟活耶遂見殺主帥義之爲棺斂並使人護送還鄉溯流數百里不踰時卽至人多異之爲立祠

趙時賞字宗白宗室子居太平州咸淳元年進士歷知旌德縣德祐元年元兵至境拒戰有功遷直寶章閣從二王入閩文天祥開府南劍奏辟參議軍事江西招討副使提兵復寧都時賞風神明俊議論慷慨有策謀及空阨之潰被執不屈死

呂武太平州步卒文天祥出使應募從行偕脫鎮江之

難沿淮東走海道賴武力爲多天祥開府南劍武以功補官天祥遣往約結州縣起兵相應復由間道會天祥於汀梅挺身捍難後死江西一軍揮涕葬之

明王愷字用和當塗人通經史太祖建中書省用爲都事歷遷左右司郎中佐胡大海駐婺州苗軍作亂害大海執愷欲降之愷正色曰吾守土義當死肯從賊耶賊怒并其子行殺之追封當塗縣男

吳晟當塗人總管昇弟陳友諒陷姑孰晟爲所執不屈死昇長子興與友諒兵戰於采石死之次子振亦歿王事

嚴德字君輔當塗人少以驍勇聞從太祖平江浙以功累遷海寧衛指揮同知守禦杭州洪武元年征台州賊戰歿追封天水郡公

林聰字文敏世襲建陽衛職聰立功兩廣歷擢都指揮僉事留鎮鬱林州成化三年蠻寇犯境聰提軍出禦戰歿捍塘

史記言字司直當塗人明季舉人由長沙令遷知陝州陝當賊衝記言出私財募士力戰俘斬甚多賊引去俄復乘雪夜攻城陷之執記言迫降叱曰有死知州無降知州也遂被殺贈光祿少卿

金鼎祚字爾錫當塗人崇正八年拔貢生授蘆山令張獻忠陷蜀鼎祚闔門殉節

沈受蒲字男玉當塗庠生崇正十一年舉賢良方正授
橫州知州以清操聞遷夔州府同知調成都獻賊破城
受蒲與弟受躬死之家口數十人俱罹害

江南通志卷一百五十五終

江南通志卷一百五十六

人物志

忠節 四 廬鳳潁三府滁和廣六泗五州

廬州府

楚范增居鄴人年七十好奇計說項梁立楚後佐項羽霸
天下漢王用陳平計間項王項王疑范增增大怒曰天
下事大定矣君王自爲之願賜骸骨歸行未至彭城疽
發背死

三國王蕃字永元廬江人博覽多聞兼通術藝爲敢騎中
常侍孫皓時衆譖毀蕃蕃氣體高亮不能承顏順指遂
廷皓意見殺丞相陸凱上疏曰蕃處朝忠蹇大吳之龍

逢也昔事景皇納言左右歎爲

而陛下惡其直對

梟之殿堂有識悲悼

宋詹世勛家於舒修偉沉毅其勇莫敵累薦爲舒城民兵正將弟世勛副之招募強壯結以信義與敵戰拷栲原被重創死

密佑廬州人咸淳十年爲江西都統元師逼撫州佑逆戰被圍數重力戰終日衆幾盡乃斫圍南奔渡橋馬蹶被執元帥壯其勇欲降之不屈許以官不受又令佑子說之曰父死子安之佑叱曰汝行乞於市第曰密都統子誰不憐汝也怡然解衣請刑觀者泣下

褚一正字粹翁廬州人武舉進士爲提刑諮議督戰高沙被創死

劉師勇廬州人以和州防禦使助姚訔守常州時張彥守呂城兵敗被執常州勢益孤元伯顏寘彥城下招降師勇以大義斥彥及城陷師勇潰圍出從二王海上憂憤而卒

元余闕字廷心合肥人少喪父授徒以養母登元統元年進士由同知爲刑部主事三月疏滌冤滯獄五百入翰林修宋遼金三史至正壬辰天下兵動闕爲淮西宣慰副使分守安慶賊不能犯者五年累遷淮南行省右丞陳友諒兵薄城下闕戰却之賊益兵來攻闕爲士卒先身被十餘創城陷死之妻蔣氏子德臣女安安皆赴水

死甥福童戰死闕賜諡忠宣明太祖詔立廟歲時祀之
明劉友仁合肥人與弟謙隨胡大海取徽寧等處多戰功
歿於陣命祔祀功臣廟

廖永安字彥敬巢人從太祖率舟師攻蠻子海牙渡江
下太平集慶克池州所至有功後擊張士誠戰太湖水
淺舟膠被執欲降之不屈死追封楚國公諡武閔

桑世傑無爲人明初與諸將攻江陰石牌寨陣亡贈永
義侯侑享太廟

汪澤廬江人鄱陽湖戰歿封廬江縣子祀康郎山

徐明合肥人陳友諒攻洪都明爲管軍百戶從指揮薛
顯開城突戰被執死之追封合肥縣男

邱明合肥人陳友諒圍南昌明從諸將往援之遇敵康
郎山大戰死於陣追贈梁縣子

王仁趨舒城人從征陳友諒戰鄱陽湖陣亡封舒城縣
男廟祀康山

王德 朱昇同戰死於康郎山皆贈合肥子祀康山忠
臣廟

宋國興合肥人年十八以總管先登與陳也先戰南臺
太祖解白龍袍衣之敵誤以爲太祖攢槊刺之至死常
遇春翼上潰圍出其弟晟嗣兄官累軍功爲副總兵靖
難後進都督封西寧侯卒諡忠順

汪河舒城人倜儻有大志嘗師余闕以文章名太祖渡

江用爲大都督府都事奉使擴廓帖木兒被拘六年完
節不屈逮王師下河南擴廓遁走定西河始得歸陳征
西方略進吏部侍郎

濮英合肥人從將軍馮勝出征遇伏發被執英絕食不
言乘間自剖腹死贈金山侯諡忠襄子瑄在襁褓卽封
爲西涼侯

瞿能合肥人通子少隨父立功驍勇絕倫建文時以都
督從李景隆北拒靖難兵力戰白溝河所向披靡斬馘
數百會旋風起及其子俱戰死

余瑄合肥人官北平都指揮與同官謝貴密謀拒靖難
師貴死瑄走居庸關練兵將襲北平成祖命將往擊之

瑄且戰且守援兵不至棄關走懷來再敗被執死之

徐凱合肥人鎮守四川靖難兵起召充副總兵移鎮滄
州與吳傑平安等相爲犄角兵敗被擒不屈死

甯忠合肥人累官都督建文初從李景隆進拒北平戰
敗真定被執不屈死

宋瑄合肥人西寧侯晟之子建文中爲右衛指揮使禦
靖難兵戰死靈璧弟瑛尙公主嗣侯爵殉土木之難同
邑劉真以軍功充大寧總兵靖難兵起真夜負勅印浮
海而南還應天成祖卽位命鎮遼東愧憤卒

陳懷合肥人永樂中積戰功至都督正統中封平鄉伯
死於土木之難贈侯諡忠毅

江南通志 卷五十一
陳植合肥人元舉鄉試不仕洪武闢爲主事建文初官
兵部侍郎靖難兵至植督師江上督將密謀送款植責
以大義督將遂殺植迎降邀賞成祖立誅其人具棺殮
植遣官護喪歸葬

周讓字克遜無爲人洪武中監生通敏博辯倜儻尚氣
節以劉基薦任給事中永樂初兩使西域被拘徙之荒
野瀕死者數讓終不屈諭以本朝恩信卒令番人隨之
入貢有重使古刺集備載其事

李紹賢字崇德其先巢人編伍泗州正德丁丑舉進士
除行人篤學敦行遇事果決以小臣抗疏諫止南巡被
杖五十創甚數日死

盧謙字吉甫廬江人萬曆三十二年進士知永豐縣擢
御史督北直學政逆璫煽焰告病歸里崇正八年流賊
破城謙朝服端坐大罵死之賊投尸於池水盡赤贈光
祿卿時殉節於流寇之亂者有合肥人黃克嘉任湖東
守備勦賊死廬江舉人張弘任四川知縣巢縣人曹同
任鄖西知縣俱城陷被執死

程楷合肥人天啟乙丑進士知平湖縣陟南禮部郎出
守東昌峻拒屬吏之餽歷雲南參政歸壬午流賊圍城
楷與經歷鄭元綬協守南薰門城陷不屈死之贈光祿
卿

胡守恒字見可舒城人崇正戊辰進士授嘉興推官召

江南通志 卷五十一
試平臺改編修晉東宮講官庚辰較禮聞乞歸養獻賊
攻城守恒與遊擊孔廷訓督民兵共守廷訓叛降賊遂
見殺子永亨夜入賊營收骸歸葬康熙庚戌成進士授
行人分巡廣東有治績

鳳陽府

漢陳咸沛國浚人成哀間以律令爲尚書平帝時玉莽輔
政誅不附己者何武鮑宣等咸嘆曰易稱君子見幾而
作吾可以逝矣卽乞骸骨去及莽篡位召咸爲掌籥大
夫不肯應時三子參豐欽皆在位悉令解官歸鄉里
門不出人猶用漢家祖臘曰吾先人豈知王氏臘乎後
莽復徵咸遂稱病篤收斂其家律令書文皆壁藏之常

戒子孫曰爲人議法當依於輕雖有百金之利無與
人重比

三國樓元字承先沛郡斬人孫休時爲監農御史孫皓時
歷官大司農皓求忠清之士用元爲宮下鎮禁中候主
殿中事元正身率衆奉法而行應對切直數忤皓意後
人誣元訕謗政事遂被詰責送付廣州華覈言元清忠
奉公乞赦之以責後效皓疾元聲名徒交趾密勅將張
奕殺之奕未忍殺奕卒元於器中見勅書還便自殺

晉嵇紹字延祖魏中散大夫康之子也十年而孤事母孝
謹山濤領選啟爲祕書丞元康初爲給事黃門侍郎以
不阿比侍中賈謐封弋陽子遷散騎常侍趙王倫署爲

侍中惠帝復阼遂居其職河間王顥成都王穎舉兵向
京都朝廷北征紹馳詣行在值王師敗績於蕩陰百官
散潰唯紹儼然端冕以身捍衛兵交御輦紹遂被害帝
側血濺御服及事定左右欲浣衣帝曰此嵇侍中血勿
去累贈太尉諡曰忠穆

桓彝字茂倫譙國龍亢人榮九世孫起家州主簿爲邊
道令累遷尚書吏部郎明帝伐王敦參密謀敦平封萬
寧縣男丹陽尹尋補宣城內史蘇峻之亂彝率兵討之
時州郡多遣使降峻稗惠勸彝僞與通和以紓交軍之
禍彝曰吾恩義在致死焉能與醜逆通問如其不濟此
則命也遣將俞縱守蘭石峻攻之將敗左右勸縱退軍

縱曰吾之不可負桓侯猶桓侯之不負國也力戰死彝
固守經年勢孤力屈城陷遇害咸安中改贈太常諡曰
簡五子溫靈豁祕沖

南北朝梁裴之橫字如岳壽陽人之高弟好賓游重氣俠
不事產業之高乃爲狹被蔬食以激勵之遂與僮屬數
百人於芍陂大營田墅遂致殷積侯景亂出爲貞威將
軍討景又隨王僧辯破侯景於巴陵景退遷平北將軍
封豫寧侯復爲吳興太守魏尅江陵橫出守蘄城營壘
未周而魏軍大至兵盡矢窮遂於陣歿贈侍中司空公
諡曰忠壯子鳳寶嗣

唐夏侯端壽春人高祖微時與相友卽位拜河南道招慰

使傳檄州縣次譙州會亳汴二州刺史已降王世充道
塞無所歸計窮糧盡麾下二千人不忍委端去端乃殺
馬宴大澤中謂衆曰我奉王命義無屈公等宜去因欲
自刎爭持之乃止世充遣人以吏部印召之端焚書解
節毛懷之間道走歸拜祕書監出爲梓州刺史
何武壽春人嘗被誣至州投石自明守釋之未幾寇起
武詣守曰此誠畢命之秋也領偏裨入樅陽兵潰鬪死
周憬壽春人仕唐謀誅武三思不克遁入比干廟謂人
曰比干古忠臣神而聰明其知我乎三思虐害忠良滅
亡不久可竿吾頭於國門以見其必敗遂自刎

宋姜才濠州人爲通州副都統時淮多健將然驍勇無踰

才才知兵善騎射撫士卒有恩至臨陣軍律凜凜守揚
州與元帥戰流矢貫肩才拔矢揮刀而前所向辟易德
祐二年宋亡阿朮使人招之才曰吾豈作降將軍耶東
至泰州將入海阿朮圍之會才疽發脅不能戰遂爲所
執勸之降肆罵不屈阿朮怒髡之揚州

元張仲仁臨淮人讀書尙氣節流寓泗州以賈魯召歸論
安豐不克死之子順理亦死

明韓成虹縣人從太祖征陳友諒大戰鄱陽湖被圍計無
所出成進曰古有殺身以成仁者臣不敢辭太祖遂賜
龍袍成服之對賊衆投水中以疑之賊遂退友諒敗死
追封高陽郡侯祠於康郎山

趙德勝濠人勇敢有氣節從太祖累功爲元帥守南昌
陳友諒攻城將壞德勝且戰且築城復完巡城至東門
腰中流矢鏃入六寸拔出嘆曰命也恨不能從上定中
原垂令名於竹帛耳言畢而絕贈梁國公諡武桓祀功
臣廟

花雲懷遠人驍勇絕人從太祖累建奇功守太平陳友
諒來攻城陷被執怒罵奮躍而起縛皆絕奪守者刃連
斬五六人衆怒叢射之至死罵不絕口追封東邱郡侯
茅成定遠人攻張士誠戰死追封東海郡公

曹良臣壽州人積功封宣寧侯北征至阿魯渾河敵驕
大集力戰死焉追封安國公諡忠壯

孫興祖濠人格之父沉毅有謀大將軍徐達倚重之守
海陵移鎮彭城累官副都督守燕山六衛出塞遇敵力
戰死追封燕山侯諡忠敏

李夢庚鳳陽人從太祖渡江與郭景祥同典文書爲左
司郎中歷都督府參軍謝再興守諸全上命夢庚往總
制軍事再興忿夢庚出己上遂叛執夢庚以降吳夢庚
死之祔祭功臣廟

張耀壽州人累功爲指揮使北征戰歿

常榮懷遠人遇春再從弟爲指揮同知隨李文忠北征
戰於阿魯渾河陷陣死之

常惟德懷遠人從太祖爲鎮撫戰死鄱陽湖封懷遠子

祭於康山忠臣廟

常德勝懷遠人從太祖爲千戶戰死鄱陽湖封壽春縣男祭於康山忠臣廟

劉成靈璧人從征有功守長興爲永興翼左副元帥張士誠兵以十萬來攻成出西門擊敗之擒其帥敵愈衆戰死贈懷遠將軍立廟長興

孫虎壽州人屢立戰功爲指揮使北征至應昌遇敵鏖戰死之追贈樂安伯

楊國興定遠人從太祖累立戰功最驍勇鎮宜興授指揮使征張士誠戰死於閶門

胡觀定遠人東川侯海次子靖難兵起力戰死

徐輝祖達長子嗣爵有材氣數出練兵各省靖難兵起建文帝命援山東與燕再戰破之及召還而諸將遂不振燕兵渡江猶引軍力戰燕王至金川門獨守父祠不迎遂削爵幽繫之尋卒萬曆中錄建文忠臣廟祀以輝祖居首諡忠貞

邱福鳳陽人起卒伍事成祖於藩邸樸鷲鷲勇臨陣致力戰深入累功封淇國公後北征至臚胸河敵大至被執遇害

李遠懷遠人以靖難功封安平侯嘗以輕騎八百破敵數萬後與邱福北征力戰馬蹶被執罵不絕口死追封莒國公諡忠壯

伍雲定遠人以衛指揮同知從征交趾屢有功仁宗初
隨方政討黎利於茶籠鼓勇陷陣死之

陳忠臨淮人永樂中積官指揮同知仁宗時從征交趾
攻多邦城先登擒僞官阮事吳忠等黎利寇清化戰死
與伍雲同優卹

崔聚懷遠人從成祖起兵累授都督僉事宣德初同柳
升征交趾升死聚整軍至昌江賊至力戰被執不屈死
魏貞懷遠人進士官御史從英宗北狩死土木之難

湯允勳字公讓鳳陽人和曾孫始爲諸生善詩景泰初
求將才周忱薦之授錦衣百戶歷衛指揮僉事諸將忌
之不令治事益放情詩酒與劉溥王淮輩唱和號十才

子天順中落職成化時以薦授延綏叅將分守孤山堡
寇大至允勳方病力疾上馬禦戰衆寡不敵陷陣死事
聞贈祭

朱勇懷遠人能子禎而虬髯歷掌都督府事晉太保久
典兵柄正統十四年隨駕北征歿於陣追封平陰王諡
武愍

劉雄臨淮人成化時爲四川都指揮僉事剛勇敢戰嘗
捕漢州賊生擒七十餘人德陽人趙鐸亂雄追之羅江
大水河連敗賊以救千戶周鼎徑奔賊陣叢刺死贈都
指揮同知子襲職

皇甫斌壽州人爲衛指揮同知每戰必身先士卒宣德

中禦寇於密城東峪自旦及晡力戰矢盡援絕而死于
弼以身衛父亦戰死

方震孺字孩未壽州人萬曆癸丑進士由知縣授御史
天啟初以巡城忤魏璫璫銜之值遼警一日上十三疏
慷慨請出關犒師遂以監軍巡按遼東時巡撫王化貞
棄廣寧而震孺莅前屯嚴守璫惡震孺亦罪及之誣以
賊私咒詛坐大辟懷宗初釋免久之起巡撫廣西京師
陷率師勤王馬士英阻之憂憤而卒

張應徵字賓明定遠人明末任泰安州同知值土寇爲
亂城陷應徵手刃數人被執罵不絕口日城破身亡吾
事畢矣遂遇害

許心亮臨淮人明末爲劉兵所執問城中虛實亮拒言
火器糧餉甚足劉怒縛於樹截其兩耳亮罵不絕遂磔
其尸

武一諤宿州人爲徐王墳世襲祀丞崇正丙子流寇亂
居民盡逃一諤謂職司林木當以死守同妻路氏及子
孫闔門罹難有司上其事請恤

陳保山臨淮人崇正八年以都司守臨淮流寇壓境保
山力戰於隆平寺死之

柳鳴鳳鳳陽人明末司訓安慶流寇破城黨有鳴鳳鄉
人欲全之鳴鳳曰丈夫受君恩寧肯偷活可借爾刃礪
我頸遂被害

孫光啟靈璧人明末爲興化教諭城破投泮水未死輿人掖以見帥予以官不受

徐永吉壽州人家貧養親自守明末流寇僭令爲賊抗節不從賊怒殺之

潁州府

周伍員字子胥潁之乾谿人父奢爲楚平王所殺員走入吳闔廬使爲行人謀伐楚魯定公四年與楚戰於柏舉楚師敗績遂入郢闔閭死子夫差立敗越於夫椒越王使使厚幣請和員諫弗聽太宰嚭讒之王賜之屬鏹之劍以死吳人思之爲立祠江上

晉丁穆字彥遠譙國人爲順陽太守苻堅寇順陽穆戰敗被執稱疾不仕後堅傾國南寇穆與關中人士謀襲長安事泄遇害

宋呂祉霍邱人進士官都督叅謀紹興間淮西副統制鄜瓊叛降於劉豫祉死之妻吳氏亦自縊以殉

孫暉霍邱人靖康之亂團結淮民保護鄉井擢招信尉建炎中北兵將渡淮暉率兵民禦之城陷死於勅書樓牛富霍邱人爲侍衛馬軍司統制戍襄陽移守樊城累戰不爲劬且數射書襄陽城中遣呂文煥相與固守兩城凡六年不拔富力居多城陷富帥兵巷戰身被重傷以頭觸柱赴火死贈靜江軍節度使諡忠烈

洪福安豐人夏貴家僮也從貴積勞爲鎮巢雄江左軍

統制貴降元遣從子招福福斬之元兵攻城久不拔貴
至城下好語請單騎入城福信之門啟伏兵起執福并
其二子大淵大源福大罵數貴不忠南向而死
鞏信安豐軍人爲荆湖都統沉勇有謀文天祥開督府
信詣之官團練使督府都統制江西招討使天祥自興
國趨永豐元兵追之信戰於方石嶺中數矢傷重不能
戰自投崖石而死贈清遠軍承宣使立廟旌之

〔元〕李冕潁州人至正辛卯劉福通作亂以紅巾爲號流劫
鄉市冕率衆拒之被執罵賊死

李黼字子威潁州人冕弟泰定四年廷試第一授翰林
修撰累官江州路總管至正十一年徐壽輝將丁普郎

來寇黼部署兵民出戰身先陷陣賊大敗黼曰賊不利
於陸必由水道薄我乃以長木冒鐵錐於杪暗植水中
會西南風急賊舟果揚帆鼓噪而至舟遇椿不得動黼
發火箭射之焚溺死者無算拜江州路都總管已而賊
勢愈熾黼勢孤援絕賊薄城焚門而入黼叱賊曰殺我
母殺百姓賊刺之墮馬與從子秉昭俱罵賊死事聞贈
淮南行省中書左丞隴西郡公諡忠文立廟江州
曹彥可毫人至正間妖賊起里中皆不知書羣趨彥可
家以刀斧逼之寫旗彥可曰我儒者知有君父豈能爲
汝寫旗遂遇害事聞諡節愍

明李傑霍邱人從征有功調北征陣亡贈鎮國上將軍

梁文潁州衛世襲指揮同知正德七年流賊圍潁上勢張甚文率官軍迎擊戰於蓮花鋪奮勇陷陣所向披靡已而賊衆大至衆寡不敵力戰死之詔加優恤陞其子爲指揮

曾翀字習之霍邱人嘉靖己丑進士授南京刑部主事改御史彈劾不避權勢且論汪鋹罪上罷鋹而惡翀疏中有諍臣杜口語杖之垂斃曰臣言已行臣死何憾竟死追諡忠節

張鶴鳴字元平潁州人萬曆丙戌進士授歷城縣知縣歷遷貴州巡撫兵部右侍郎總督陝西三邊晉本部尙書引疾歸復起南工部尙書安奢構禍再授節鉞視師

五省懷宗初予告回籍八年流寇攻潁捐金募士授兵登陴城陷被執罵不絕聲備極楚毒而死時年八十五子大同字同甫寇至匿諸弟他所獨隨父見父死伏尸號慟罵賊以死合家男女殉難者十數人

張鶴騰字元漢鶴鳴弟萬曆乙未進士授潞城縣知縣調榆次值歲饑煮粥躬親散給投藥施耜收育棄嬰後皆以張爲姓徵戶部主事擢郎中累陞雲南副使請告還里流寇至與兄鶴鳴督戰守禦城陷死之

王印字雲卿潁州人工五字詩築慧湖別墅游處其間旁有廢塚或勸平之笑曰此亦吾隣也作隣墓記刻石護焉更創宗祠以聯族凡冠婚喪祭一以古禮爲法流

寇至以善射守城及城陷縊於城頭柏樹以死

劉廷傳字惟中潁州人九光從子為諸生狀貌魁梧任俠好義萬曆末楊應龍反播州調兵及潁潁兵不願行將殺護行尉為亂廷傳乃攜酒脯邀於郭外相與雜坐飲啖以微言動之且為保任其家室眾感悟崇禎八年流寇入潁州易衣冠拜祖廟遣子體仁速去賊至瞑目叱之遇害

劉廷石字洞甫九光子博通古今書善策事公卿咸欲薦之曰吾不欲由他途進流寇薄潁廷石守西門竭力堵禦賊乃由北門入被十餘創輿歸伏枕猶口授其兄廷榜及學正周逢泰數百言令繕牘乞隣道兵殺賊遂

絕

甯儉字堯光潁州人中立子貢入成均以假還里屬流寇熾甚乃散家財募戰士得二百人寇薄城命長男印昌率義勇出南城禦賊賊轉至北據高樓攻城而城陷矣僕從勸其引避儉不聽與妻楊氏端坐堂上賊至厲聲大罵夫婦同時遇害幼孫龍亦殉焉

韓光祖字肇華潁州人進士獻策之父宿儒碩學流賊至被執脅使跪叱曰吾生平讀書止知忠義遂大罵賊怒碎其屍妻妾俱死仲子定策字五雲見父遇害手刃二賊被殺孫日曦亦罵賊死

劉大濟字汝楫潁州人為名諸生潁陷於賊至西七里

河自投於水而死州人私謚曰節慎先生

王聘汝字起莘潁州人母時氏殉難聘汝憤甚糾集鄰壯數百人殺賊力戰於楊家店自己至酉身被數十創死

陳繼信字鳳津潁州人工趙仇諸家畫法年六十餘有童駮狀平居自謂善刀劔買一刀刻殺賊報天子五字於柄上賊至結束精嚴或謂其老宜自愛曰公故不知我一命須數命爲抵城潰持刀擊賊於南城傷五六人刀折遂見殺

郭三杰字荆門潁州人年四十舉於鄉居近北門流寇至登陴助守見西北隅潰投黑龍潭死

鹿勁字建功潁州人生負神勇善騎射流賊攻城衆推勁守北門賊附而上者擊踣無算近郭有高樓俯臨雉堞賊登之矢石交下城破猶巷戰殺賊賊蜂擁而至勁子身無助中十餘矢乃斃賊怒鬻割肢體殆盡事聞祀忠烈祠

李從師潁州衛指揮同知領兵二百守城城陷獨身轉戰受十三創而死

王廷俊潁州衛指揮僉事防守西門射一賊中額賊識其面城陷磔之

田之穎大理寺右寺副 李生白光祿寺署丞同妻韓

氏 李元白光祿寺署丞同妻王氏 楊南陝西會寧

縣知縣 劉道遠封文林郎浙江黃岩縣知縣 丁嘉

遇四川夔州府學訓導 李茂叢貢生 楊得坤貢生

王之麒潁州衛千戶 孫陞潁州衛百戶 羅元慶

中所百戶 田之振潁州衛百戶 田得民中所百戶

汪檀前所百戶 尙日濟武舉人 李承訓武舉人

汪邦弼候選經歷 李維紀諸生同妻趙氏及子女

一家十八口投井死 王致志諸生同妻唐氏 田大

生 聞于階 聞于邦 王國泰 元鳳翔 卞文斗

王乾亨 丁嘉運 劉棻 姚克智 丁崇先 郭

之英 姚同寅 尙日恒 陳純 李孕生 王致和

申華 郭之豪 田之萃 郭瑋 馬負圖 錢人

瑋 盧元貞 馬宋國 馬柱國 韓中佐 楊于世

王啟昌 邢元錫 熊叶夢 王維新 李汝珽

盧傳世 喻天敘 楊士貞 郭之產 郭獬 賀嘉

貞 聞慎言 四十一人 俱諸生 王文煥 田之蔚 田之茂

田之尹 四人 俱監生 張濟民 醫官 孔道隆 祀生 田之蕙 丁振先

二人 俱儒士 元中元 嚴克長 王尙廉 元旋 祁標

王公枋 六人 俱處士 張肅範 王之幹 趙謙 祁瀛 潘

守仁 汪茂椿 張思明 黃國 八人 俱商民 王九成 工人 自

田之穎至王九成并妻女家口共一百二十二人皆潁

州人死乙亥寇難

周應正武平衛人正千戶由武舉任浙江都司倭寇犯

江南通志 卷一百一十一
杭州應正募得義兵千人趨賊營斬首百餘乘勝追至
黃山寇突出四面攻圍正力戰被鎗陣亡題奏立祠贈
本衛指揮僉事

雅元聲亳州人孝廉流寇至亳脅之從聲曰吾登賢書
委身於國豈肯作賊賊怒殺之並及其子

秦培篤太和諸生崇正八年流寇至與妻王氏俱被獲
賊首欲用之篤曰吾朝廷良士肯委身於賊乎賊又令
其叩頭稱千歲卽釋之篤植立不屈嚼齒大罵賊怒碎
其齒斷其舌罵猶不絕夫妻同被害

秦思凡太和人流寇抵縣被擒卽駢之攻城凡大聲呼
城上曰死賊無計攻城不過牛皮覆車以避矢石所懼
惟火語未畢賊碎其首守城者遂以柴藁焚皮車城因
得全

滁州

明吳得全椒人洪武中爲龍里守禦所千戶三十年古州
峒蠻作亂攻城得乞兵貴州都司堅守以待賊燒門急
攻得開門奮擊中毒弩死贈指揮僉事

譚淵滁州人驍勇善射洪武中襲父勝職爲燕山護衛
副千戶從靖難戰於真定及壩上馳騎突陣斬獲甚多
至夾河搏戰馬蹶被殺永樂初追封崇安侯諡壯節子
忠以淵故封新寧伯

方政全椒人勇略過人以靖難功累遷都督同知充總

兵官出鎮松潘叛番聽命逋亡復業移鎮大同正統初
進右都督征麓川援絕突陣死追封威遠伯諡忠毅
周賢滁州人景泰初累功至都指揮僉事天順初擢都
督僉事赴寧夏寇二萬騎入賢擊之連戰皆捷追至野
馬澗中流矢卒賢初坐事下吏自以不復用後釋罪感
激誓死報竟如志贈都督同知子玉字廷璧嗣職舉將
材歷官至右都督

何洪全椒人襲世職正統中從征麓川景泰末從征天
柱銅鼓皆有功歷官都指揮使掌四川都司事成化初
擢都督僉事留四川趙鐸反數陷城殺吏洪擒斬其將
賊引去乘勝陷陣爲賊所圍左右跳盪殺賊甚衆力竭

而死贈都督同知

和州

宋蔣子春歷陽人隱居教授建炎初北兵至新塘見子春
容儀秀整欲命以官子春怒罵被殺

陸有常歷陽人建炎初知臨淄縣抗敵而死事聞贈官
廕子

龔楫字濟道其先處州人父原崇寧中謫居和州遂家
焉楫懦如不勝衣聞北兵南下陷諸郡縣輒忿恚不食
誓以必死及北師築堡新塘楫率家僮與鄉兵往襲之
先勝後敗力鬪而歿

明耿定和州人宣德中以薦辟歷刑部郎中有能名出爲

浙江叅議正統十年處州盜起定引軍勦捕率先督戰陷陣而死事聞贈按察使

馬如蛟字騰仲和州人天啟壬戌進士授浙江山陰令清操皜然崇正元年徵授御史以彈劾著直聲出按四川預平安邦彥之亂八年冬獻賊犯和州如蛟方里居傾貲募士與知州黎弘業登陴固守麾壯士出擊賊兩戰皆捷會風雪晝晦守者皆潰賊遂入城如蛟率士巷戰力竭被殺兄鹽運司判官如蚪弟諸生如虹及家屬十四人皆死詔贈太僕少卿

張元楨和州人官鴻臚寺序班歸里後獻賊攻城分守北門城陷被殺贈本寺署丞

陳問世 陶應昌 陶應賡 姚承舜 趙世光 以

上俱和州諸生獻賊破城問世以衛母見殺餘悉掖母投水死

楊鳳墀 王良翰 王之節 宋鶴齡 成建中 李

寅陽 郝萬秋 馬文卿 盛唐 盛美 以上俱和

州人城陷鳳墀闔門殉節餘皆不屈死

俞應登含山人崇正中由貢歷卽墨縣教諭獻賊破舍邑不屈死

劉芳遠字芝南和州人崇正十四年歲貢授嘉定訓導十七年闖寇陷北都芳遠聞變哀慟整衣冠北向拜畢坐明倫堂自刎

張秉純 徐正夫俱和州諸生聞北都之變秉純絕粒
死正夫自縊

廣德州

宋王汝翼建平人知廣德縣元兵入境汝翼死之

明夏魁暘字宿甫建平人以貢訓奉化攝浦江縣事賊陷
義烏及浦江魁暘誓衆登陴城破執抗罵不屈殞於池

六安州

明徐公輔六安人以軍功從太祖征陳友諒戰死鄱陽湖
中後贈東海郡侯廟祀康郎山

徐瑾六安人正統間爲鄞縣丞處州盜起瑾率壯士邀
擊數有功因援兵不至死之朝廷遣使優恤廕一子

劉會字嘉會英山人正統乙丑進士官戶部主事己己
北征主事羅紳當扈從適母病會與紳同年相友善請
代行土木之難遂罹害景泰初勅獎廕子入監

劉世芳字穎玉英山拔貢生歷任廬陵宛平丞陞新河
令超擢濟南僉事未至任甲申三月流賊陷京城得報
仰天慟哭以頭觸柱嘔血數升卒

黃今度字國顏六安人明季壬午流賊攻城今度破產
偕紳士固守城陷被執諭以歸順今度大罵誓不欲生
賊怒以髮繫馬曳之而走力脫躍城濠中四面射之皆
不中溺死直立水中面目如生髮指皆裂其弟今文亦
殉難死妻徐哭累年亦死

張國正六安人世襲千戶陞指揮明季壬午流寇襲城
國正督眾巷戰中流矢死子斯美奔救亦死時鎮撫陶
賡明指揮劉良佐文學田呈芳梅國秀霍山黃中理劉
炫吳時道張大翼李懷信胡瑋江源洞宋貞及時際順
等均不屈節死

泗州

晉劉翼淮陵人衡陽太守永昌之亂起兵復晉祚力戰死
之

南北朝宋劉位招信縣橫山人靖康初率數百人勤王將
行會淮上盜起部使者檄位保鄉井盜畏其鋒號橫山
劉家軍建炎三年合兵收復滁州即攝州事敵奄至城

下出戰中流矢歿於陣詔贈建寧節度使建廟於滁賜
號剛烈

梁任孝恭臨淮人幼孤事母至孝家貧無書從人借讀一
過目略無所遺梁武帝聞其才召入西省為司文侍郎
文筆敏速每奏稱善侯景之亂不屈被害

明耿再成字德甫五河人從太祖渡江多著勞績累陞行
樞密院判官守處州會苗軍叛再成聞變即上馬收兵
不及迎賊痛罵遂被害追封高陽郡公諡武壯子大璧
見武功

井孚盱眙人洪武中鎮守龍里古州洞蠻林寬作亂燒
城門孚戰死贈正千戶世襲

江南通志 卷五十一
李紹賢字崇德盱眙人正德丁丑進士授行人嘗頒詔
至徐州有中使席班首立命撤之中使愕然去諫武宗
南巡廷杖死嘉靖初贈御史

姚允恭盱眙人由貢任霍山訓導教士有方秉性剛毅
值流寇臨城冠帶坐明倫堂罵賊殉難事聞贈國子監
學錄

王養正字聖功州人崇正元年進士歷官南康知府殲
巨寇鄧毛溪熊高一方賴之後分巡建昌城破被執死
陳濟世字斗華五河人由歲貢任沭陽縣訓導致仕歸
里崇正十六年流寇破城縱兵肆掠濟世曰爲國諸生
不能殺賊當守不能守當死忍坐視其淫掠乎遂整冠

帶同妻趙氏坐明倫堂罵賊而死

國朝周永緒字繩武盱眙人順治六年進士爲廣西副使遇
寇殉難於平樂

贈光祿寺少卿

200

